



Akta Komunikasi dan Multimedia 1998 kini diperingkat akhir pindaan

Oleh Zanariah Abd Mutualib - Oktober 27, 2023 @ 5:16pm

zanariah_mutalib@bh.com.my

CYBERJAYA: Suruhanjaya Komunikasi dan Multimedia (MCMC) kini di peringkat akhir meminda Akta Komunikasi dan Multimedia 1998 bagi memastikan undang-undang itu lebih berkesan untuk berdepan cabaran teknologi dalam talian.

Pengarah Kanan Bahagian Hal Ehwal Pengguna dan Industri MCMC, Eneng Faridah Iskandar berkata pihaknya melihat pelbagai model untuk menangani pengaruh aktiviti negatif atas talian, seperti penipuan dan perjudian yang semakin berleluasa, namun pada masa sama memberi penekanan untuk memupuk kesedaran dalam masyarakat.

Justeru katanya, satu sesi libat urus akan diadakan minggu depan bagi mendapatkan maklum balas pihak berkepentingan untuk menambah baik akta berkenaan.

"Apakah titik sentuhnya dan adakah pengawal seliaan adalah satu-satunya jalan keluar?

"Adakah wujud keperluan untuk meningkatkan usaha advokasi atau melakukan pelbagai strategi bagi mengatasi isu ini, yang saya fikir hanya akan dicapai melalui libat urus dan pendekatan pelbagai pihak berkepentingan.

"Ini adalah isu yang tidak berkesudahan dan adalah perlu untuk pengawal selia sentiasa berhati-hati dan peka dengan trend terkini, bukan saja apa yang sedang berlaku tetapi juga modus operandi penipuan dan agenda tersembunyi penjenayah," katanya.

Beliau berkata demikian ketika menjadi panel pada Persidangan Pasca Hari Wartawan Malaysia (HAWANA) dengan tema 'Usaha Malaysia Untuk Landskap Media Yang Mampan' anjuran Kelab Akhbar Kebangsaan (NPC) di sini, hari ini.

Panel lain ialah Ketua Pegawai Eksekutif Kumpulan dan Pengasas Bersama Big Room Media Sdn Bhd, Datuk Zainul Arifin dan Kolumnis/Wartawan The Mole, Abdul Rahmat Omar.

Yang turut hadir, Presiden NPC, Datuk Ahirudin Attan dan Timbalan Pengarang Kumpulan BH, M Thillinadan.

Sementara itu, Zainul mencadangkan supaya kerajaan mengkaji penyaluran dana kepada industri media di negara ini bagi memastikan kemampanannya seperti dilaksanakan di beberapa negara lain.

Katanya, ia akan membolehkan industri media yang kini berdepan cabaran getir untuk terus bertahan dan memberikan perkhidmatan yang diperlukan negara serta rakyat.

"Jika kita mahukan media yang mampan dan boleh dipercayai, industri ini perlu disokong. Jika sokongan boleh diberikan kepada petani dan industri getah, seperti melalui pemberian dana serta baja, begitu juga dengan industri media.

"Siapa akan melakukan tugas untuk berkhidmat kepada masyarakat, memerhatikan kerajaan dan perniagaan? Itulah tugas media.

"Jadi, saya fikir ini adalah sesuatu yang kerajaan harus lihat kerana ia bukan untuk manfaat media tetapi negara dan masyarakat untuk jangka masa panjang," katanya.